

att
o

AM DA MALSHK GA NA DAMSH ST. LUKE.

LIGI

GOSPEL ACCORDING TO ST. LUKE.

CHAPTER I.

1 Altha wil wihēl da wāl dadā t'in amadau shimgit malshk ga da wila wāl gaut gū gwalakya'an dida shpa-gumt,

2 Ni hōuda n't wila gilginam dida gum, gū nat in amgait lip nish dida wilhishidātk gut dilt nat in hakhalhalsh ga algiak ga;

3 Dī wālumsh āmtk ga da goi, gū wil shim āzaga na ālthbagun da wagait wātk ga da hīgaugut. ā dum dī amadaum damīshū da gwan, shimoigiat Theophillus;

4 Dum wil shim maganun ma dum wilai gau na wil shūwilaigiamuk-shint.

5 Dha ga gault ga priesta gish ga n'da kingsh Herod, gish ga Judea ga, wāt gish Zacharias. wātk gut gish ga wilnadalth gish Abijah; ada wātk gish ga naksht gish gaktlthgū'um hanānaksh Aaron ga, adat Elisabeth ga wāt ga.

6 Ada mila hakhoigiakt gish ga zalsh ga Shimoigiat ga Lakāga, ash

gut lūliyāk gish ga tkānish ga na yaoulthemgushk dilt wilalautk gish ga Shimoigiat ga Lakāga ash ga wha nahakhokshk gut ga.

7 Ada althga dī lthgōlthk gut, ash ga wil gup whati lthgōlthk gish Elisabeth ga, ada ltha shim mila liklēksht ga,

8 Ada wil wālt ga, ashī hiyāouqsh gut giansh ga halthal dash ga priest a gish ga hazakithk gish ga Shimoigiat ga Lakāga ash ga ltha dīt niat ga giant ga,

9 Niwālt ga guni wila wāls ga halthal dash ga priest a ga, niat gut in lūgēutk gish ga dumt shisha gwāluksh ga mihokshut gish ga ltha za zīnt gish ga zum templesh ga Miyān ga.

10 Ada tkānish ga wī wilhēlgia-dum giat ga hiyāgwut ga gigiengwākltht gish ga tka gililuk ga ash ga hiyāouqsh ga gianum mihoksht ga.

11 Ada wil alūdāsh ga na angeltk gish ga Miyān gish niat haik gut gish ga nakshimyaōnsh ga haliōmgaukshum mihoksh ga.